

Turnerinnenreise 3./4. September



*hinten: Angela „Gogo“ Stepper, Romy Anderhalden, Julianna Egger, Brigitte Hofmann, Ursula Casanova, Erika Temperli
vorne: Gaby Casanova, Angie Piller, Astrid Christen, Tanja Winiger, Daniela Longoni*

Nün Turnerinne, bim schönschte Sunneschy
schieged am Samschtig id S-Bahn i
z'Züri holed zwei no Kafi, Gipfeli gits au
denn gahts witer nach Rapperswil und Nesslau
mit em Poschtauto nach Wildhus-Lisighus
d'Tanja chunnt beschtens drus
bis dahi isch alles guet gange
und da werdet mir vo zwei
witere Turnerinne empfange

s'Auto für die schwere Rucksäck schtah bereit
es wird nüt, wo mir nüd bruched mit treit
jetzt hämmer eus i zwei Gruppe ufteilt
Fitti und Fuli hätt s'Angi gseit

Gaby Casanova, Tanja Winiger



die Fitte hätt s'Sässeli uf Gamsalp transportiert
vo det sinds uf dä Chäserrugg marschiert
mir Fule sind i einer Rueh
uf Umwäge Unterwasser zue

Mir sind öppe ä Schtund gmüetlich gloffe
und dänn bim Iltios-Bähndli itroffe
das und ä Luftseilbahn hätt eus uf dä Chäserrugg ufe bracht
uf eme Bänkli hämmers eus bequem gmacht
euses Ässe uspackt, d'Berge beschtunt
alli glücklich und beschtens glunt
plötzlich ghört mer lut schnufe und chüche
die Fitte chömed a z'chrüche



*Gaby
Casanova,
Tanja
Winiger,
Brigitte
Hofmann,
Erika
Temperli*

*vor dem
Säntis
(links)
und
Wildhauser
Schafberg*

Ganz eso isch es natürli nüd gsi
es lueged no alli einigermasse frisch dri
jetzt händ die au ihres Picnic gässe
und dänn simmer alli no chli im Reschterant gsässe
für dä Abschtieg hätts wieder zwei Gruppe gä
die Fule händ s'Gondeli nach Iltios chönne näh
em Klangwäg entlang bi viele Chüe verbi
simmer öppe am vieri im Hotel Schwändi gsi

Die Fitte sind au iräendwänn cho
und dänn simmer ☺ dä Ursula zum Apero
nach eme feine Aesse und viel lache
tuet sich eis ums ander i die obere Schtöck uf mache
am Morge, wie jedes Jahr, chömed alli froh und frisch
an feine Zmorgetisch
eis hätt leider müesse hei
in Sache Niereschtei
nüd es hätt die Schtei debi gha
sondern dehei dä Ehemaa
defür isch jetzt d'Manuela i troffe
und mit dä Fitte uf d'Sellamatt gloffe

Mir andere sind uf Unterwasser dä Thur entlang
ganz gmüetlich nach Alt St.Johann
mit em Gondeli uf d'Alp Sellamatt
eso Bähndli fahre isch eifach glatt
da obe hämmer alli im Reschterant gässe
sind no es Schtündli zwei zäme gsässe
dänn händ sich die einte uf d'Socke gmacht
die andere hätt s'Sässeli uf Alt St.Johann bracht
am 3 simmer mit em Poschtauto nach Buchs gschtartet
und genau so lang hätt dä Petrus gwartet

Über Sargans simmer am sächsi diheime gsi
zwei sunnigi, schöni Täg sind verbi
Gaby du häsch alles wunderbar gmacht
aber wie häsch ächt dä Petrus uf eusi Site bracht
das müemer dänn irgend einisch beschpräche
ich ha gmeint die Heilige lösed sich nüd beschtäche
wänn Geburtstagschind debi sind isch scho toll
s'eige Portmone blibt immer voll
dä Schpänderinne möchtet mir danke säge
und wünschted no es langs, guets Läbe

**Romy
Anderhalden**



Angie Piller, Astrid Christen